



**USM Dengan Kerjasama UPM Anjur National Clinical Immunology Symposium (NACLIS)**



*Tan Sri Mohd. Ismail Merican (memukul gong) merasmikan NACLIS dengan disaksikan oleh Prof. Dr. Azhar Mohamad Zain (kiri).*

**SERDANG, 30 Julai** – Institut Perubatan dan Pergigian Teraju (IPPT), Universiti Sains Malaysia (USM) dengan kerjasama Fakulti Perubatan dan Sains Kesihatan, Universiti Putra Malaysia (UPM) telah menganjurkan **National Clinical Immunology Symposium (NACLIS)** bagi meningkatkan kefahaman pengamal perubatan, saintis klinikal dan pekerja makmal terhadap penyakit 'Primary Immunodeficiency' (PI) yang dihadapi lebih 100 pesakit di Malaysia.

Simposium itu membincangkan pendekatan klinikal dan terkini mengenai PI yang disampaikan oleh pakar imunologi bertaraf dunia dari United Kingdom dan Australia berdasarkan model negara mereka melalui pembentangan kertas kerja dan perbincangan kes PI sebagai landasan untuk program latihan tempatan.

Simposium bertemakan 'Issues of Primary Immunodeficiencies in Developing Countries' itu telah dirasmikan oleh Ketua Pengarah Kementerian Kesihatan Tan Sri Mohd. Ismail Merican di Hotel Marriott, Putrajaya dengan dihadiri oleh Dekan Fakulti Perubatan dan Sains Kesihatan UPM Prof. Dr. Azhar Mohamad Zain dan Pengarah IPPT USM Dr. Ramli Saad.

Simposium itu dipelopori oleh satu kumpulan pengamal perubatan dan saintis yang mewujudkan jalinan 'Malaysian Primary Immunodeficiency Network' (MyPIN) dan dibiayai oleh IPPT USM.

Pengerusi NACLIS Prof. Dr. Lokman Mohd Noh dalam ucapannya berkata NACLIS membincangkan isu latihan sub-kepakaran untuk immunologist klinikal/immunopathologist di Malaysia dan forum mengenal keperluan latihan sub-kepakaran imunologi yang akan menjadi perintis penting program ini yang bermula di Malaysia.

"Kerjasama dengan pusat perubatan ternama di luar negara dijalin melalui penyarah jemputan luar negara untuk latihan kepakaran khusus dan membantu meningkatkan kemampuan makmal Immunologi Klinikal di samping memantapkan aktiviti penyelidikan sedia ada," katanya.

Antara pembentang pada simposium ini ialah Prof. Dr. Lokman Mohd Noh, Assoc. Prof. Dr. Alyson Kakaios, Prof. Dr. Andrew Cant, Dr. Siraj Misbah dan Prof. Dr. Stephen Adelstein.

PI adalah penyakit kelahiran dan dikenali dengan jangkitan yang kerap kali berulang. Diagnosis yang lewat atau tidak betul boleh menyebabkan pelbagai komplikasi yang boleh berakhir dengan kematian.

Diagnosis penyakit PI memerlukan penyiasatan makmal imunologi peringkat tertiar diikuti dengan interpretasi oleh pakar imunologi klinikal yang terlatih. Diagnosis yang tepat hanya akan dapat dibuat di makmal imunologi peringkat tertiar tetapi makmal sedemikian adalah terbatas di Malaysia.

Justeru, kini masanya telah tiba untuk komuniti perubatan mengkaji isu PI di Malaysia untuk menyediakan keperluan perubatan kepada pesakit PI dan keluarga mereka.



*Tan Sri Mohd. Ismail Merican bersalaman dengan pembentang kertas kerja.*

**Disunting oleh Seksyen Media, Publisiti dan Penerbitan, Bahagian Komunikasi Korporat UPM**